



Selasa, 10 Oktober 2023

Ogen : Obaja 1:18-21



Si Pemenang



Seorang juara sejati akan berjuang melalui apa pun” nina Floyd Mayweather, Jr, sekalak petinju bas Amerika Serikat. Erbage usaha silakoken guna ndatken kemenangan. Payo, kemenangan e jadi sekerajangen kalak si erjuang.

Dibata erjuang guna bangsa pilihanNa. IdahNa uga megombangna kalak Edom nandangi bangsa Juda si sangana itaban ras ngalaken kiniseran. Tawa dengen cirem ia natap bangsa Juda si dem i bas perbeben. Nubuat nabi Obaja ngatakan maka kemenangan sekerajangen kalak Jerusalem. Iandingken me maka kesusuren Jakup ras Jusup e pagi desken api si gurlah nciluk bangsa Edom si megombang. Italuken dengen ikuasaina me bangsa Edom enda janah Epraim ras Samaria e mulihken ku Israel. Si itangko ndube iulihken mulihi, janah si ibuang mulihken me ku asalna ndube e me Jerusalem. I je me inganna ibereken Dibata. Kalak Jerusalem jadi pemenang sabap Edom kedungenna ikuasaina me. Kemenangen e rehna i bas Dibata nari janah Dibata jadi raja Israel, seh rasa lalap.

Senina Moria, kegeluhen i bas pertibi enda dem i bas peperangen. Erperang ngelakan biak-biak daging, kejahatan ras kuasa-kuasa si la teridah. Maun bas pusuhta pe mekatep nge terjadi peperangen. Guna si e teruslah make senjata si ibereken Tuhan bagi sikataken Paulus i bas kitab Epesus 6:10-20. Tedis bas ketuhu-tuhun, makeken kebujuhen ras keriahen ukur, bage pe kiniteken si paguh guna tetap ertoto erpengendes/ ngerembakken diri ras Dibata. Kata Dibata empelimbarui gegehta guna ndatken kemenangan si tuhu-tuhu. Uga gia gegehna ras teremna musuh man alanken, kemenangan e jadi sekerajangen kalak si tek, emaka si cidahken kesetianta man Dibata. IA tetap raja bas kegeluhenta.